

1. Decembar -Svjetski dan borbe protiv HIV/AIDS-a


Prvi decembar/prosinac Svjetski dan borbe protiv HIV/AIDS-a, obilježava se svake godine s ciljem podizanja svijesti o pandemiji AIDS-a, uzrokovanoj širenjem HIV infekcije. Obilježavanje ovog dana predstavlja priliku za ljude širom svijeta da se ujedine u borbi protiv HIV infekcije, da pokažu potporu osobama koje žive s HIV infekcijom, i da se prisjete onih koji su umrli od posljedica bolesti. HIV nastavlja biti vodeće globalno javnozdravstveno pitanje, s oko 36,7 (34,0-39,8) miliona ljudi koji žive s HIV infekcijom na kraju 2015. godine i 2,1 (1,8-2,4) miliona novoinficiranih osoba u 2015. godini. U istoj godini, 1,1 (940.000-1,3 miliona) miliona ljudi je umrlo od uzroka povezanih s HIV-om globalno.

Osnovna tema ovogodišnje kampanje je „Ruke gore za #HIV prevenciju“, koja obuhvaća različite aspekte HIV prevencije i njihov odnos prema specifičnim grupama ljudi, kao što su adolescentice i djevojke, ključne populacije i osobe koje žive s HIV infekcijom.

Epidemiologija HIV infekcije i AIDS-a u Federaciji Bosne i Hercegovine


U razdoblju od 1992. godine do kraja 2016. godine u Federaciji Bosne i Hercegovine (Federacija BiH) registrirane su 194 osobe kojima je dijagnosticirana HIV infekcija. Među njima su 93 osobe oboljele od AIDS-a (Grafikon 1). U istom razdoblju, 45 oboljelih osoba je umrlo. Među zaraženim osobama 85% je muškog spola. Najveći broj HIV slučajeva registrira se u dobnoj skupini od 30-39 godina (32%), odnosno u dobnim skupinama od 25-49 godina (66%) (Grafikon 2). U posljednjih pet godina u Federaciji BiH prosječno se registrira 15 novih slučajeva infekcije HIV-om, što čini stopu od 6 slučajeva na milion stanovnika, odnosno predstavlja nisku razinu HIV epidemije. Zabilježeni porast novootkrivenih slučajeva infekcije HIV-om posljednjih godina povezan je sa većim brojem testiranja, što je rezultat djelovanja centara za dobrovoljno, besplatno i povjerljivo savjetovanje i testiranje.

Grafikon 1. Broj registriranih slučajeva infekcije HIV-om i AIDS-a, Federacija BiH 1992-2016.




U 2016. godini, u Federaciji BiH registrirano je 13 novih slučajeva zaraze HIV-om, te 4 slučaja oboljevanja od AIDS-a.

Grafikon 2. Dob i spol registriranih HIV slučajeva, Federacija BiH 1992-2016. (kumulativ).



Grafikon 3. Registrirani HIV slučajevi, prema načinu prijenosa i godini prijavljivanja, Federacija BiH 1992-2016.



Prema načinu prijenosa u ukupnom broju slučajeva, dominantan način zaražavanja HIV-om bio je nezaštićeni spolni odnos, i to homoseksualni (muškarci koji imaju spolne odnose s muškarcima-MSM) s 44,8% i heteroseksualni s 43,8%. U posljednjih nekoliko godina, zabilježen je porast infekcije HIV-om među MSM populacijom, s najvećim zabilježenim brojem slučajeva u 2014. godini (13 slučajeva). Za 7,7% slučajeva način zaraze HIV-om je bio injekcionim korištenjem droga (nesterilan pribor). Zabilježen je i jedan slučaj vertikalnog prijenosa, s majke na dijete.